

Kaiwo Bo Boru Paulusi Soi We Jemati Na Korintusi

Kaiwo dedung we 2 Korintusi

Na rabuang bo Paulusi soi kaiwo anatu nei we jemati na Korintusi fo, eweboyari riati kaha. Manea etairiri Paulusi tuti eteiayari eteyo wiro rasuli dine kaha. Ampafe Paulusi denatu Titusi dontai tono bendari Korintusia, kia ne kaiwo tapapa paria wesa. Mayei daraberahi sobu Paulusi na Makedonia aha, deisaharai wei kariri jemati na Korintusi efau fosa etaraberasa weru eteiayari fo tuti earomioi aha. Mae manea eteiayari pampang.

Donio Paulusi soi suratinei wesa. Soi deisaharai wesa kariri ne fi yu we Kristusi fo. Deyo enewawusa paria tuti todoni piraise weo etaraberasa weru eteiayari fo. Akawuru wori dutansa ambori efanduhi doi we etohonai we ene doroi ene pari fi na Yudea fosa. Tuti na wefui ai aha mani, deyo todoni kontai Yesusi ne rasuli dine, tuti na kaiwo tapapa deretawang maneiru teaio ewerasuli wetarai kaha fosa na wanai.

Kaiwo na suratinei deto kutuai toninai:

1:1-11 Kaiwo fafong.

1:12-7:16 Paulusi deisaha kariri ne enetituai we dontai wesa fo, deiriri kariri todoni wiuwu Kristusi ne Kaiwo Mahikai fo, tuti dutansa ambori eweboyari riati aha.

8:1-9:15 Dohong kaiwoariri kariri etohong doi we efata mano ene pari fi na Yudea fosa nai.

10:1-13:10 Paulusi medu kariri mantauni, wetarai werasuli we Yesusi dine, tuti deretawang inontaraio eteiaya ne mambiriuo werasuli fo.

13:11-14 Kaiwo kife.

Mahikaifea

1 ¹Weo doroi Allai ne jematiwa mea na bendari Korintusi tuti Allai ne inontarai memararebana wa mea kiai tantenang na nu Akhaya wai.

Kaiwo anatu ninai na yau Paulusi, na Seng Allai ne dawiafo terai yuai yau we Yesus Kristusi ne rasuli, tuti na tane doroi Timotiusi kontai.

²Kadono tane Dai Allai tuti Seng Yesus Kristusi urohong une bengfo arora we mea tuti urohong mea menumiruainso ne maifo.

Allai dohong tata taenemirorong mitubaru na dadira rorong tasodaira ne

³Tafiai Allai, mano tane Seng Yesus Kristusi tamanai. I mani Dai mano aroai sewa dine tuti Allaio dohong inontaraine taenemirorong mitubaru foi dine. ⁴Andino dohong amenemirorongnei mitubaru aha na dadira amesodairi fi kiai ne, ambori na amenemirorong mitubaru amesobuai ria Allai tonana fo, amea kontai amefata inontaraio enemirorong fituaya fosa kontai ao enemirorongfoi mitubaru aha. ⁵Weo dadira bitoya Kristusi sodairia foi, amea kontai amesodairi, ampafe na tonanane kontai, Kristusi, mano dohong inontarai enemirorong mitubaru foi, dohong amenemirorongnei mitubaru fuba aha. ⁶Amesodai dadirafo mani, finanai werang we amefata mea menemirorongwai mitubaru aha tuti ambori mekaharai weru ne karirafo ki. Tuti Allai fiata amea amenemirorongnei mitubaru aha mani, finanai we ambori menemirorongwai mitubaru aha kontai ki, wedaya metawang mea na dadira rorong toyari dadira amesodairi nini. ⁷Tuti amenemitawanai paria we metoaria mutu, wiwo amenemiwawera we mea kaha, weo amewaitawanai we mesodai dadirafo kariri ameara fo, tonanai kontai Kristusi dohong menemirorongwai mitubaru kariri niari we ameara fo.

⁸Doroi meaine, ametohong weai paria we dohona meserawawera kariri dadira raminde amesodairi na nu Asia fi wani fe. Dadira nani fiabai tuti miraba paria, wedaya amenemirorongnei fituayai, wiwo amenemitawanai we ametarang ahang kaha. ⁹Tarai, amenumiruainso toyari aiboi marareha fo watai wawu amea ampa. Wape finanai amesodairai ambori amenemitawang amene mambiriune fanai, mae amenemitawang te Allai mano duwi inontarai emarareha foi ne mambiriufu. ¹⁰Andino feriri amea weru dadira fuba amesodairi nani, donio amemarareha ahang kaha, kontai andino feriri amea tonana rai. Andino amenemitawani teri we ambori feriri amea weru ne karirafo pampang ki, ¹¹mai kariri mefata amea na mene nadi mewenadi we amea wai. Na tonanane kaiwasa bitoya metutang tutu amea we Allai, ambori Allai mioang amea, donio mefau mefiai Allai metohong mahikaifeai wei ki.

Paulusi deisaharai we fiouki ne rahida dontai to Korintusia fo

¹²Fio dohong amea ameboi amearomi weai fa mani, na amenemirorong ketui nei, amewaitawanai we fi kiai amenari na nunei

nini, reantenang mani na todoni ameweboyari ria mea fo, finanai amenari na amemararebanai tuti na amenemirong mesio Allai dohoni foi, wiro na awai nunei kaha, wape kariri Allai ne bengno dohonai arora fo. ¹³⁻¹⁴Weo fianai aino amesoi we mea mau ne, amesoi kariri fio mawa we metatorai tuti metafura fo. Ninaia mani, metafu fio ametawi wea fo kutea terai, wape enehutawanai we ambori metafuraia mai pari ki. Na tonanane, na rahida bo Seng Yesusi daraberahi nai aha ma foi, ambori meboi mearomifo we amea ki, kariri amea kontai ameboi amearomine we mea fo.

¹⁵Na irosoai tonanafo wedaya raminde enehutituai we yontai mau ituambawa mea weberu, ambori moanafo mesobu weberu beyari.

¹⁶Enehutituai we yeyo, na yontai to Makedoniafo, yontai mau ituambawa mea akawuru wo, ambori yontai pari to Makedonia ki, tuti yarabera yau na nu Makedonia foi aha ma mani, ituambawa mea nariai aha, ambori mefata yau yontai pari to nu Yudea foi aha. ¹⁷Reantenangfo enehutituai tonanai, akawuru wori enehutituai siai aha. Ampafe imadu tonana mani, menemitituai we enehutituai sauara kaha e? Ete rahida enehutituai kariri fi inari fo, enehutituai na mantaung yau e? Doni katu mani imadu yeyo, “Yo,” mayea mani imadu aha yeyo, “Bereri.”

¹⁸Wape, mai kariri Allai we dohong kariri fi medura fo, amene kaiwo amewuwuai we mea fo nani wiro amemadurai na amenemirong boru kaha, amani ameteyo “Yo,” tuti “Bereri.” Wiro tonana kaha. ¹⁹Weo Yesus Kristusi Allai ne Kaisungfoi mani, wiro we enerorong soriru we fiea dine kaha. Mae Yesusi nani dino, yau Paulusi, Silasi, tuti Timotiusi, antowuwui we mea ne, tuti I mani, ne enetituitafo wiro yiwani kaha. I wiro medu deyo, “Yo,” tuti “Bereri,” kaha, mae deyo, “Yo,” pampang. ²⁰Weo andino Allai ne kaiwo derera fo kai kawariai nai ne, na Kristusi Allai medu deyo, “Yo,” finanaia. Nanai wedaya tataparanding Allai, tamadu na Yesus Kristusi wonongfo tateyo, “Antu.” ²¹Allai meiri andino niari amea tuti mea tatoaria mutu na Kristusi ne. I kontai andino diri tata wei tera ne, ²²yuai tata kawurua we ne tata, tuti sensoni taenemirongnei na Nuaninu Mirarebana foi, wefiainawiai ambori tawaitawanai we dohongno fianai aino dereri kiaia foi we tata ki.

²³Raminde nanai wiro yontai to Korintusi aha mau kaha, weo imaya we menemirong fituaya kahai na metarami nehu kaiwo tapapa paria we mea fo fanai, amani kaiwo isua mea na tapapa kariri mano anta dohong sasari kerirara foi nani.^a Imadurai tonina ne, itofa kaha, weo Allai deitawang enehurongnei. ²⁴Wiro ametanggoa mea kariri mene meroasoawa kaha, weo meroaso Kristusia mutu ampa. Manta ameteyo amerufi ria mea ambori memararing paria aha.

^a 1:23 1 Korintusi 5:1

2 ¹Nanai wedaya na rabuang bonani ikutuai we wiro yontai we mea mau kaha, weo nana mani wedaya menemirongwai fituaya ahang fefe. ²Weo masino yohong menemirongwai fituayai, nana mani mandoni dino sona enehurongnei mitubaru aha ne? Manea siai esona enehurongnei kaha, mae mea terai, mano inari menemirongwai fituayai nani mea. ³Ampafe raminde nanai isoi kaiwo anatu nanai we mea mau ambori rahidao yontai mau ituambawa mea mani, wiro metohong enehurongnei fituaya kaha, mae metohong enehurongnei mirising tuti mitubaru, weo finanai mai we menari tonana. Weo iroasoai we masino imirising mani, mea kontai mefaraise. ⁴Isoi kaiwo nanai we meafo, isoi na enehurong fituayai tuti miraba pariao isai, wiro we inari mea mesai kaha, wape we ambori mewartawanai we enehuwawu mea fuba paria.

Todoni kontaio oiai mano dohong sarawa foi

⁵Kariri inontaraio anta dohong sasari foi nani, tarai, i niari yau isai, wape ne fuba sewa aha mani, niari mea menemirongwai sawai mesai paria, we ne sasari anta niariri tonana fo. Ete tarahio imadu tonana mani, imadu tapapa karera, ambori tarao nehu kaiwone tapapa karera fanai mani, imadu yeyo wedaya maneiru teai na mea terai menemirong sawai. ⁶Na mea mefau metohong aiboi wei ampa, tuti aiboi sodairi nani, demoyara to. ⁷Mae ninaifa mani, fio menari wei mani, meteiai ne sarawafo tuti menari enerorongfoi mitubaru aha, ambori wiro enerorong fituayai karera fanai. ⁸⁻⁹Weo raminde nanai isoi kaiwo anatu kariri metohong aiboi wei nanaifa we mea mau we ititua kariri mea we metohong kariri kaiwo yohonai we mea wa kiai ete bereri e. Ampafe ninaia mani, yutang mea paria we ambori meteinaiafa wei aha we tarai menemiwawuti. ¹⁰Weo masino meteiai inontaraio dohong sarawai we mea waia mani, yau kontai yeiai wenani. Tuti, tarai anta dohong sarawa mani, yeiairi ampa. Fianai aino yeiairai tonana mani, yeiairai na Kristusi urengreafo, tuti nanai we mene bengwa. ¹¹Inari tonanaifa fo, ambori Saminseni sobu rang we weanggari tata pariao wedaya tata tatawa fanai, we wiro taserawawera ne enetituitafo kaha.

Paulusi weansarai we Titusi na Troasi

¹²Rahida bo yontaia sobu bendari Troasi we iwuwu Kaiwo Mahikai kariri Kristusi naya fo, iwatioai we Sempaiafi rang we yau we irufi na wanai. ¹³Wape enehurongnei mesi pari kaha, weo isobu tane doroi Titusi na wana kaha. Enehutawanai dontai weru mea to Troasi kontai, kia kaiwo kariri todoni mesobu nehu kaiwo anatu anta nani. Ampafe yontai, yohong mahikaifeai we inontarai na wana fosa tuti yontai to Makedonia aha ma.

Na Kristusi Allai niari Paulusi weniunsai mampori we kaiwasanei

¹⁴Wape yohong mahikai we Allai, weo na ameweboyari ria Kristusi fo, tefu amea we ne fi tuti kia amea pampang we amerariati na ne rang rorong etaparandini we inong wemambiriu foi. Allai kia amea tonanai we ambori na amea, kaiwo kariri Kristusi fo dafai wariai to doni kontai toyari finiunsai mampori we ne niunsaifo sefarai to katai doni konta fo. ¹⁵We amea mani, amene tarai toyari finiunsai mamporio Kristusi niunumi we Allai foi. Toyari finiunsai mampori fo ameha kaiwo kariri Kristusi we mano ambori feririsa fosa, kontai we mano ambori esobu ne karira fosa. ¹⁶We mano ambori eworu fosa amene tarai toyari finiunsai piro toyari fi mirehara weo ametaiririai wesa kariri ambori eworu fo, mae we mano ambori esobu mai fosa amenunsai mampori wesa, weo kaiwo amewuwuai wedayasa etarang. Tuti mandoni dino mesi we niari finana na mantauni ne mambiriufu ne? ¹⁷Wiro amene tarai kariri inontarai siai bitoyao etairiri Allai ne Kaiwofo toyari fianggeng etawayanai we esera we ra naya fo kaha. Mae amea mani, amewuwuai na Kristusi wonongfo, tuti na amenemirorong mesi na Allai arongreafo, weo Allai demi ne inontaraine amea we amenari tonanai.

Korintusifosa ene tarai kariri fiainawiai todoni

Paulusi itoru itowerasuli wetarai we Kristusi

3 ¹Amemadu toninafo, tarahio menemitituai meteyo amefiai bera mantaung amea ahang fe, wirot tonana kaha. Ete, toyari inontarai siai fosa, amea kontai ametohong weai we amesobu surati fia amea bei tonanai, surati nani soi we mea ete na mea ma e? Wape wirot tonana kaha. ²Meaino mene tarai wekaiwo anatu deinawiai we amea mani rasuli di amea fo, weo meroaso amene kaiwo amewuwuai we meara fo. Finanai toia mutu na amenemirorongnei tuti mandoni kontai ewatioai tuti etatorai. ³Ne tarai kariri amene kaiwo amewuwua fo webong kawuru ampa, amani webong paria na mea. Na tonanane metainawiai we mea mani mene tarai wekaiwo anatu Kristusi soi di mea, tuti kaiwo anatu nani wirot soi na dawati kaha, mae na Allai mano darang foi Nuaninufufoi, kontai wirot soi na kamiei timba toyari Hukumio soi we Musai foi kaha, mae soi na inontaraine taenemirorongnei.

⁴Amemadu kariri amea tonanai weo na Kristusi ameroaso Allai tarai. ⁵Wiro ametohong fieai we fiainawiai we mantaung amea amewemambiriu we amenari finana kaha, wape Allai dino dohong mambiriu we ameane. ⁶Andino niari amea amewemambiriu we amewemangfata we Kaiwo Arerai Waworu bei. Kaiwo Arerai nani weneung na Allai Nuaninune, wirot na Hukumifo kaha. Weo Hukumi nani wedaya mararehafoi wape Nuaninufufoi dohong tata tatarang wefitawafa.

**Allai ne Kaiwo Arerai Waworu nei mahikai
sewa Kaiwo Areraio Musa soi fo**

⁷Fafongfa Allai dohong ne Hukumifoi we Musai, amani ne Kaiwo Areraio biui na kamieifo, tuti Kaiwo Arerai Mamo nani kia marareha we inontarainesa we inontarai manei wiro wemambiriu we dohong kariria na mai kaha. Kaiwo nanai Allai dohoni na ne sambewaraio dadai fo, wedaya Musai urengfo sambewarai. Tuti sambewarai nani adareti de niai wape ne sambewarafoi wedaya inontarai Israeli fosa euremifoa wiro ewemambiriu we ewati Musai urengfo nariai ahang kaha. ⁸Tonana mani todoni kontaio Kaiwo Arerai Waworu Allai Nuaninufoi dohoni foi da na sambewaraio dadai sewa aha. ⁹Masino Kaiwo Arerai Mamo kia aiboi we inontarai foi sambewarai tonanai, nana mani Kaiwo Arerai Waworu wedaya inontarai enemirorong mesi na Allai urengreafo aha fo ne sambewaraio dadai fo fuba sewa aha. ¹⁰Weo tarai we fianai aino fafongfa sambewaraifa fo, titua weai na sambewaraio dadai sewao fuinini mani, wedayaria sambewarai ahang kahai ampa. ¹¹Weo masino Kaiwo Areraio woru fo sambewarai tonanaia, nana mani Kaiwo Areraio wiro woru na wea kaha fo ne sambewaraio dadai fo fiabai sewa aha.

¹²Amenemitawanai tonanai paria ampafe wiro amematai we amemadu kariri finana kaha. ¹³Wiro amene tarai kariri Musai we tebung wedua urengfo na ansung aburung ambori inontarai Israeli fosa wiro esaiteo Sempaisi ne sambewaraio adareti de niai weru urengfo nana kaha. ¹⁴Wape enemituitaitafo rahaibu ampa, weo paria rahida bonini kontaio fi tebung wedua Israeli fosa nani tebung weduasa pampang ne, na rabuang bo etato Kaiwo Areraio fafong foi fo. Etaramioai mae esobuai kaha. Weo fi tebung weduarai nani niai terai na taweboyari ria Kristusi fo. ¹⁵Paria ninai kontaio na etato Kaiwo Musai soi fo, fi weduarai nani tebung wedua enemirorongfo rai. ¹⁶Wape na doni kontaio manei enerorongfoi tiwera we Sempaisi mani, fi tebung weduari nani Sempaisi yuaisi weruri. ¹⁷Weo Sempaisi mani Allai Nuaninufoi diarana ne, tuti Nuaninufoi niayai na mandoni mani, wenani kesaua. ¹⁸Tuti ninaia mani, mano taroasoa ne tata, tahasau weru fi tebung wedua tauremi fo, tuti Seng Yesusi ne sambewaraio dadai fo keiwewa na tauremine. Sempaisi, amani Allai Nuaninufoi, yiwang tata tane tarai kariri mantauni ne taraifoi, na ne sambewaraio keiwewa pari aha foi.

**Ra Waidani, amani Kaiwo Mahikai fo, nayai
na babeu tamui na kahofafo**

4 ¹Tonana mani, na Allai ne aro amea ne, dohong amea amewuwu ne Kaiwo Arerai Woworu ne, ampafe wiro amenemirorong fituaya kaha. ²Ampafe amehurumitare fio mamunggasai tuti fio kia mamaya

fo, amepampamu kaha, tuti wiwo amebariwera Allai ne Kaiwofo kaha. Mae na ametaikariri kaiwo wetarai fo ao kasaua fo, amenemitawanai we kaiwasane kiai, na enemirorong ketui foi mani ewatioai we amemasi na Allai urengreafu. ³Masino Kaiwo Mahikai kariri Yesusio amewuwua fo, wiwo manea etafura kaha, toyari fi tabung wedua euremifo, nana mani mano ambori eworufu ansaino etafura kahai tonana ne. ⁴Weo inontarai wiwo eroasoa kaha fosaine, inontarai nanisa Saminseni, mano weseng we fui karira nini, kiobu enemitituitafo ampa toyari niarisa euremifafara. Ampafe wedayasa wiwo ewati Kaiwo Mahikai fo ne sambewarafo ahang kaha, amani Kaiwo Mahikai kariri Kristusi ne sambewaraio dadai fo. Andino wefiainawiaio kasau kariri Allai ne. ⁵Weo kaiwo amehoramai ninai wiwo kariri amea kaha, wape kariri Yesus Kristusi we weSengfo. Tuti amemadurai we amea mani, amewewoming terai we mea, kariri ne dawiafo. ⁶Weo Allai medu deyo,

“Na mamantiti rorong fo,
Sambewarafo kawariai ma!”^b

Allai nani kontai Andino niari ne sambewaraia nani dansairai na taenemirorongfi ne, ambori nano ne sambewarai nani tawaitawang kariri Allai ne sambewaraio dadai fo dansairai na Kristusi urengfe fo.

⁷Wape amea mani, amene tarai kariri babeu mesi kahaio Allai samui na kahofa, mae na amene tarai wemambiriu kahai nini ameha ra dedai pari feai, amani Kaiwo Mahikai kariri Kristusi fo. Ambori na tonanane kasau we mambiriu fiabai niai na amea nini na Allai ma, wiwo na amea kaha.

⁸Dadira bitoya na fifiani kontai yua amea paria, wape amemangganggung kaha. Fi bitoya wedaya amea amesera wera amenari fi todoni, wape amenemirongnei fituayai kaha. ⁹Inontarai enari kanggani amea wape Allai sawing amea kaha. Eboi ameara ametawai, wape ameworu kaha. ¹⁰Yesusi sodai dadira pariao mirehara, tuti fi tonana fo amesobuai pampang kontai na rahida neungne amemainenang we amemareha toyari I. Amesobu dadira tonana mani, ambori inontarai siai ewatioai we Yesusiarang na amea tuti wedaya ametarang na tarai. ¹¹Weo na ameminohi na nufi ninai, mararehafoi wiwo waroi weru amea kaha, mae inontarai erurai we emung amea pampang we amewuwu Yesusi fefe. Ambori na tonanane, inontarai siai ewati we Yesusiarang na amene taraio ambori wioru nini ki. ¹²Ampafe na tonanane, amewuwu Kristusi fo tarahai wedaya amemarareha, wape amehutuai we amesodai tonanai kontai, ambori werang we metarang we fitawafa.

¹³Na Kaiwofo weai dotu tonina:

“Iroasoai, ampafe imadu.”^c

Na ameroasoai tonana fo kontai, wedaya amemadu kontai. ¹⁴Weo amewaitawanai we Allai mano duwi Seng Yesusia suwi na marareha

^b 4:6 Kejadian 1:3 ^c 4:13 Masmuri 116:10

rorong foia foi, ambori duwi amea kontai ria Yesusi tuti kia mea tuti amea awa tatoari na arongreafoa ki. ¹⁵Fi amesodairi kiai nini kia beng we mea rai, ambori Allai ne beng dohonai arora we inontaraine tatara fo, kaiwasa eroasoai bitoya ahang fosa esobuai fuba aha tuti wedaya etohong mahikai we Allai tuti etaparandini.

**Taenemirorongnei fituaya kaha, weo na taroasoai terai we
Yesusi taureminei niyai terai na fi maio tasobua rai fo**

¹⁶Nanai wedaya wirow amenemirorong fituayai na wea kaha. Rahida neungne amene tarainei sodai ne karirafu, tuti firurung pampang we wioru ki, wape rahida yiwang rahida amenumianinune Allai yiwani weworu pampang aha. ¹⁷Weo fi amesodaira ne maraba paria, wape ambori wedaya amesobu mirising fuba tuti sambewarai dedaio watai we numainufo. Tuti watioai na mirising fiabai nanai mani, dadira amesodairai nanai wirow ene waroi kaha tuti seiayai. ¹⁸Ampafe wirow ameuremifo nayai na fio watioai na tauremi fo kaha, mae na fio watioai kaha fo. Weo ne watioa fo mani watai waroi kaha, wape ne watioa kaha fo aino watai wefitawafa ne.

5 ¹Weo tawaitawanai we tane yawanei, amani tane taraio na nufi nini, mitota mani, Allai mantauni ambori meinenang munu bei na Waidani we tata ki, amani munuo wiatai wenumainu, munuo wirow inontaraine enariri kaha. ²Taminohi na yawa tasobui na nufi nini, taenemirorongnei disang tata tasai tuti tapapirahai weo taenemirorong dohong we tasansung tane tarai na munu waworu tasobui na Waidani foi. ³Weo tasansung tata na tane munu waworu na Waidani foi mani, wirow tane tarainei niai arora ahang kaha. ⁴Tarai we taminohi na yawa na nunei nini, taenemirorongnei disang tata tasai tuti tapapirahai we ne maraba tasoduata ne. Tanumiruainso tonanafo, wirow taenemirorong we tahatai weru tane tarai nunei nini ambori tanai arora kaha, mae tatohong weai we tasansung tane tarai weworu na munu Waidani nani. Ambori tane tarai weworu Waidani nani yiwangno tane taraio mireha nei aha. ⁵Allai mantauni dino meinenang tata we finana ne, tuti dohong Nuaninu Mirarebana foi we fiainawiai we tata kariri fi kiao meinenami we tata nani, deinawiai we todoni kontaio dohona rai.

⁶Finanai wedaya amenemirorong wemambiriu pampang. Amewaitawanai we ameminohi na amene tarai na nufi nini, amenayai waroi weru munuo ambori ameminohi nai ria Sempaisi fo. ⁷Weo ameminohi ninai amenemitawang te ameroaso amene Mananu Yesusi ne, wirow amenemitawang fianai aino amewatioa fo kaha. ⁸Nanai wedaya amenemirorong wemambiriu tuti amefaraise paria we ameteyo ametawing amene tarai nini, ambori ameminohi na amene kataifo wani ria Sempaisi. ⁹Ampafe amerurai paria we ambori Seng Yesusi eneo amea,

na amenayai na nunei nini ete ametawera werui. ¹⁰Weo tata kiai todoni kontaio ambori tatoari na Kristusi arongreafo, na rahida kiutu kaiwo kariri tata fo, ambori mansiari-mansiari sobu fiembaitafo kariri fianai aino niaria na nufi nini, niari ne bengfo ete niari ne karirafa ne.

Allai niari inontaraine tata tabeng riati aha na Kristus Yesusi

¹¹Amewaitawanai todoni kontaio tamatai Sempaisi, amani tasomi wei na tarai tuti maifo. Ampafe nanai wedayao, amerurai paria we ambori amewiwiang mandoni kontai wei. Allai deitawang amenemirongnei tarai tonanai tuti enehutawanai we mea kontai mewaitawang amea tonanai kontai, na menemirong ketui wai. ¹²Na toninafo, wirot amefiai bera amea we mea ahang kaha. Wape ameteyo ametohong rang beng fo we mea we meboi mearomi tuti amea. Ambori na tonanane mewaitawang todoni memadu we inontaraio eboi earomi we fi watiafo, amani fio kariri Hukumi Musai soi fo, wirot kariri fio niayai na taenemirongnei, amani taroasofo, kaha. ¹³Masino eteyo amewefiauwo ampa, nana mani amewefiauwo na euremifo we amerurai paria we ameraria Allai, wape masino amemadu na amenemituitaitaio mai fo mani, finanai we mene bengwa. ¹⁴Weo Kristusi enewawufo aino wedaya amenari tonanafo, weo amewaitawanai we manei mireha we inontarainesa kiai ampa, tuti finanai deinawiai we inontaraine tata tamarareha kai ampa, amani tanai na mamantiti rorong fe fo. ¹⁵Tuti Kristusi mireha we kaiwasanei kiai, ambori mano eminohi etarang fosa wirot etarang we etohong kariri mantaunsa ene etawiafo aha kaha, mae we etohong kariri Kristusi ne dawiafo terai, amani Kristusio mireha tuti suwi wesa aha fo.

¹⁶Ampafe ninai to fongna mani, wirot ametitua we manei kariri todoni inontarai nunei sa etituasa kariri ene fi toa fo ahang kaha. Tarai raminde ametitua Kristusi toyari inontarai batang tonanai, wape ninaia mani, ametitua tonana ahang kaha. ¹⁷Ampafe, mandoni dino weboyari ria Kristusi mani, wenani Kristusi niariri weworu ampa. Ne mamofonai ampa, mae ne waworufo da kawuru ma ne. ¹⁸Finanai kai Allai dino niari ne. Na Kristusi, Allai niari tatara taweboyari riati aha, tuti demi tata we tanari finanai, amani we tafata inontarai siai ambori esobu beng nanai kontai. ¹⁹Amewuwuai we na Kristusi, Allai niari inontaraine taweboyari riati ampa tuti wirot deto we sasari tanariri foi ahang kaha. Tuti kaiwo kariri taweboyari riati aha nanai Allai yoaso amea we amewuwuai tonana kontai.

²⁰Ampafe amea mani, Kristusi ne inontarai demi amea we ameriwani amemadu ne kaiwofo di amea, ne tarai toyari Allai medu na amea dutanai paria we mea we mera weia. Na Kristusi wonongfo, ametanggowa mea we meweboyari ria Allai aha. ²¹Weo Kristusi dohong sararifea kaha, wape Allai niariri sodua tane sararinei kiai, ambori na Kristusi nani taenemirong mesi na Allai arongreafo ki.

6 ¹Amea mani Allai ne maniwowiri amerufi wei di amea, ampafe ametanggoa mea we wirow metua Allai ne bengno dohonai arora we mea wa na ne Kaiwo Arerai Warowu wa, pariao nai weru mea funoma fanai. ²Weo medu toninaia deyo,

“Na rabuang bo enehurorong denteng foi, tarahuo wau,
tuti rahida bo ifariri kaiwasafai, ifata wau.”^d

Mewati ma, rabuang bonini mani, rabuang bo enerorong denteng foi dine. Rahida bonini mani rahida deyo feriri mea foi dine.

Na fifianai kontai Paulusi etainawiai we Kristusi ne mangfata mesi disa

³Na fifiani kontaio, amerurai we ambori amewedua inontarai weru eraria Kristusi fo fanai, ambori kaiwasa wirow eteibera fi ameru we Kristusi fo kaha. ⁴Mae ametainawiai na fifiani kontai we Allai ne mangfata amerufi wei na mai di amea. Ametainawiai tonanai na dadira todoni fieai kontaio, ametawang amea pampang naya fo, ⁵kontai na rabuang bo inontarai eruba amea fo, esoa amea to aitamu rorong fe fo, eroya amea fo, amerufi mamboni paria fo, wirow ametena naria kaha fo, tuti amene pari fi ametang fo, ⁶na amenemirorong mirarebana fo, na amewaitawanafo, na ametawang amea fo, tuti amenemirorong denteng fo. Na fi tonanane kiai ametainawiai we amea mani Allai ne mangfata di amea. Kontai na Nuaninu Mirarebana foi sensoni amea fo, tuti na amenemiwawu na amenemirorong mesi fo, ⁷kontai na amewuwu kaiwo wetarai fo, tuti na Allai ne mambiriufi fo. Ametainawiai tonanai kontai na todoni amerutawang Allai ne enerorong mesi fo na amewarami dowei nei tuti na amewarami domoya nei, wefimamuna we amea. Ambori na ameminohi na amenemirorong mesi tonana ne amemainenang we ameharaikobu ne karirafu nano amenemirorong mesi nani. ⁸Kontai na inontarai etato amea tuti esahu tawang amea konta fo, na etairiri amea tuti efiai amea fo, na amemadu na tarai wape esahu amea we ametatofa fo, ⁹na amewe amewonomi we kaiwasa bitoya foi wape esahu tawang amea konta fo, na adareti amemareha wape ametarang nendai fo, na eruba amea wape amemareha kaha fo, ¹⁰na enari ameara amenemirorongnei fituayai wape amemamarising pampang fo, na amene tarai toyari inontarai ne pari fi wape amewedaya kaiwasa bitoya ene fi fo, tuti na amene sobu fieai ahang kaha mae amene maino fifiani konta fo.

¹¹Doroi inontarai Korintusi wa meaine, fifiani kontaio amemaduraia kasau we mea ampa, wirow ametadiwa fieai we mea kaha. Mewati todoni amenemiwawu mea ampa. ¹²Wiro amehafe anemirorongnei we mea kaha, manta meaino mehafa menemirongwai we ameane. ¹³Ninaifa

^d 6:2 Yesai 49:8

mani yeyo imadu we mea toyari imadu we nehu arikang terai, amani yeyo, mefai menemirongwai kontai we amea.

**Paulusi deretawansa we eweboyari ria
inontarai eroasoa kaha fosa fanai**

¹⁴Dohonao meweboyari ria inontaraio wiwo eroaso Yesusi kaha fosa fanai, finanai masi kaha. Weo ne masifo weboyari ria ne karirafu rai e? Tuti sambewarafu weboyari kontai ria mamantitifu rai e? ¹⁵Kristusi weboyari ria Beliari^e rai e? Ete inontarai yoaso Kristusi nei tuti inontarai yoasoa kaha foi umasi na uroasofo rai e? ¹⁶Tuti Sempaasi ne Munu Omi Wei Nai foi weboyari ria aririwangfosa rai e? Weo tata mani Allai Mano Darang foi ne Munu di tata. Toyari Allai mantauni medu ria ne nabi fafong fosa deyo,

“Yau ambori iminohi rahansa
tuti inayai riasa,
tuti esahu Yau we ene Seng Allai,
tuti isahusa we nehu inontarai.”^f

¹⁷“Allai deyo,

‘Ampafe, mera to boriai weru inontaraio etaroanso Yau kahai nanisa
tuti mehatai werusa.

Wiwo mewaramikeha disanso fi werarika fo fanai,
ambori ika mea ma.”^g

¹⁸Yau ambori iweDai we mea

tuti mea kontai nehu arikang di mea ki, ambori isahu mea we
nehu kaisung tuti kamitung.’

Sengno weMananufaisi ne kaiwo finanai.”^h

7 ¹Doroi enehuwawu meawa meaine, na ne Kaiwo Arerai Waworu ne Allai dererai tonanai we tata ampa. Ampafe todoni kontai taruairurang tatara tamararebanai weru fio kia rarika we tane tarainei tuti we tanumianinunei fo, amani tahatai weru fi werarika tonana fo kiai. Todoni kontaio tamararebanai na taminohi na nufi ninai weo tasomi we Allai na mai fefe.

**Paulusi piraise paria, weo Titusi dontai na Korintusi ma
deisaharai we Korintusifosa etohong we eweboyari riati aha**

²Metohong katai we amea na menemirongwai. Weo wiwo ametohong sarafieai we manei na wea kaha rai, amewedaya manei dohong karirafea kaha rai, tuti wiwo ametofa manei na weai we ameha ne rafo weruri kaha. ³Imadu tonanafo wiwo enehurong we

^e 6:15 Beliari, nana mani deinawio Saminseni dine. ^f 6:16 Imamati 26:12; Yeremia 32:38; Yeheskieli 20:34, 41 ^g 6:17 Yesayai 52:11 ^h 6:18 2 Samueli 7:8, 14

yinggai mea we menari sarawa kaha. Weo, kariri fianai aino imadurai kawurua fo, we amenemiwawu mea paria tuti mea mani mene katai na amenemirorongnei ampa, ampafe tatarang ete tamarareha mae tawemaniwowiri pampang.

⁴Iroaso mea paria tuti enehurorongnei dedai we mea paria. Amesodai dadira bitoya ki, wape metohong enehurorongnei mitubaru tuti mirising paria. ⁵Rabuang bo amesi ameawemi na nu Makedonia nei kontaio, wirowi amesobu rahida kuteai we ameminohi uka kaha. Dadirafo nayai woru amea, inontarai na boriei weru jematinei emamuna we amea, na amenemirorongfuisi kia matai we amea kontai. ⁶Wape Allai Mano niari inontarai enemirorong fituaya fosara enemirorongfoi mitubaru ahang foi, niari amenemirorongnei mitubaru aha kontai weo Titusi dontai ma fefe. ⁷Amenemirorongnei mitubaru tonanafo, wirowi na dontai ma fo tera kaha, mae na deikaririai we amea we todoni metohoni enerorong mitubaru fo. Deikaririai kontai we metohong weai paria we mesobu yau aha fo, we metatua mea paria we fianai aino raminde menari fo, tuti nina mani memainenang we memadu tuti yau na menemiwawu yau fo. Fininai kai dohong yau imirising paria aha.

⁸Tarahai kaiwo anatu tapapao raminde yenatuai we mea mau nanai dohong menemirongwai fituayai, wape wirowi yetua wea kaha. Tarai we rabuang bonani yetua kuteai we mea weo iwatioai we menemirongwai fituayai kuteai, mae wirowi ene waroi kaha. ⁹Wape ninaia mani ifaraise ampa, wirowi we menemirong fituaya wa kaha, mae we na menemirong fituayai nanai wedaya metarabera mea weru mene metohong toa wara wa. Weo menemirong fituayai nanai Allai dawi weai tonanai. Ampafe wirowi amewedaya mea mesobu dadirafea kaha. ¹⁰Weo taenemirong fituayai kariri Allai ne dawiafo tonanane wedaya tatarabera tata weru tane sasarinei tuti kia faririfo we tata. Tuti mandoni kontai wirowi detua we fi tonana fo kaha. Wape taenemirong fituayaio kariri nunei ne dawiafo kia mararehafo we tata, amani taminohi na mamantiti rorong fo.

¹¹Into mewati kariri todoni menemirongfoi fituayai kariri Allai ne dawiafo ne! Finanai wedaya mea merurai na mamboni paria we meruairurang mene taraiwai tuti menari ne wetaraifo, menemirureu sasario inontarai nani niari fo, mematai Sempaaisi, menemirong dawi we mesobu yau, mefaraise paria we fi merurai wea wa, tuti memainenang we metohong aiboifo we mano dohong sarawa foi. Na fininai kai meteinawiai ampa we menari fisarawafea kaha.

¹²Ampafe isoi surati nani we mea mau fo, wirowi mano anta dohong sarawai nani dino wedaya isoi ne kaha, ete we mano sodai dadirafo na fi sarawai tonana foi kaha. Mae isoi surati nani fo we ambori mewaitawanaia kasau we memainenang we mefata amea na Allai arongreafo. ¹³Nanai wedaya amenemirorongnei mitubaru aha.

Tuti wirot amenemirorongnei mitubaru tera kaha, mae amemirising kontai sewa aha we amewatio Titusi we mirisingfo, weo mea kiai metohoni enerorongfoi mitubaru aha fefe. ¹⁴Tarai we raminde Titusi dontai we mea kaharai mae yeparanding mea paria wei, tuti wirot metohong mamaya yau kaha. Toyari fikiaio raminde amewuwuai we mea fo mani kaiwo wetarai fine, tonanai kontai metainawiai we Titusi we fi bengno amemadurai wei na amefiai mea fo, wetarai tonanai kontai. ¹⁵Ninaia mani enewawu mea pari aha, weo aroai kariri todoni raminde mea kiai wiwiaing mea mani metaramididauwi fo tuti kariri todoni metamang wei na mai tuti metatori na mematai fo. ¹⁶Ifaraise paria weo iroaso mea na fifiani konta fefe.

**Paulusi dutansa we efanduhi doi we efata ene
doro esobu dadirafo na Yerusalemifo**

8 ¹Doro Korintusiwa meaine, ninaia mani ameteyo ameteikaririai we mea ambori mewartawang kariri Allai ne bengno dohonai arora we jematinesa na nu Makedonia nei ne. ²Ea esobu dadira fuba paria. Wape na dadira fuba esodairi nani, emirising paria donio ene pari fi arorawa tonanai ki, wape na ewarami takahetuai paria fo etohong doi kontai we efata inontarai siai. ³Yeyo imadu kaririaifa kontai we fianai aino etohonai nanai, etohonai kariri fiani aino esobua fo, tuti etohonaia sewa ne esobuafo nanai kontai. Wirot manei demisa kaha, mae mantaung saino enemitituai tonanane, ⁴tuti etanggoa amea paria we ea kontaio efata Yesusi ne inontarai emararebana fosa na nu Yudea foi na fianai aino esobua fo. ⁵Tuti fi etohona fo, fuba sewa ne amenemitituaitafo. Reantanang mani etohong ene taraifo we Sempaisi we etohong kariri ne dawiafo, mayeai we amea kontai. Enari tonanafo, enari kariri Allai ne dawiafo. ⁶Nanai wedaya ametutang we Titusi we daraberahi to Korintusi we mea aha mau. Weo andino anta fiata mea na mefanduhi doi we metanatui we mefata tane doro na Yudea fosa. Ampafe ametutani we fiata mea menariri kiai ao meinenang, mai kariri mene menemirorong denteng fo. ⁷Na fifiani kontaio mene fong pari; na meroasofo, na memadufo, na mewartawang fi mai fo, na merurai tarai fo, tuti na menemiwawu amea fo. Ampafe yutang mea we todoni kontaio mene foniai na fi beng ninai kontai.

⁸Imadu tonanafo wirot yere we mea we metohong kariri nanai kaha. Mae imadu kariri inontarai Makedonia nesa we todoni enemiwawu fuba tonana fo ambori iwati mea kontai we menemiwawu inontarai siai fosa na metohong doi we mefatasa nai mani fuba todoni. ⁹Weo mewartawanai na mai ampa we tane Seng Yesus Kristusi todoni dohong ne bengfo arora fuba paria we tata fo ampa. Weo I ne ra bitoya paria, wape sawing ne fi fuba nani kiai, mae niariria ne pari fi, ambori na ne pari fi nanai wedaya tata tane ra bitoya na Allai arongreafo.

¹⁰Kariri doio fanduhiai we fata inontarai naya fo, enehutituitane toninai, amani denteng sewa we mea we metohong kariri mene menemitituitaia fo. Tarai defuina bo fafongna foi meaino reantenang pari mefanduhi doi we mefatasa tuti nanai tera kaha, mae meaino reantenang pari we menemititui we menari finana ne. ¹¹Ampafe ninaia mani, metawina fanai mae menaria kiai ki na fi mesobuai demoyara fo. Todoni kontai menari fininai na menemirorong mirising, kariri raminde nanai memirising we menemititui kariria fo. ¹²Weo masino fi metohonai nanai na menemirorong mesi mani, Allai ambori demang we finanai. Weo Allai demang we fianai aino metohonai na fio mesobua fo, wiwo fi sewao mesobua fo kaha.

¹³Wiro yawiai we iwedaya mesodua ne marabafeai na mene pari fi arora wa, mae inontarai siai fosa etawing ene marabafo kiai tuti esobu sayayafo kaha, manta enehutituitai ne beng sewa ne mani, tata kiai tamasi. ¹⁴Na ninaifa mani, mene fi mesobuai sewa wa, metohonai we fiata fio esobua kaha fo, ambori na rahida siai wori, fianai aino esobuai sewa fo fiata fio mesobua kaha fo, ambori na tonanane memasi na fi mesobua fo. ¹⁵Toyari soi na kaiwofo:

“Mano fianduhi bitoya foi,
wiro ne fia bitoya karera kaha,
tuti mano fianduhi katui foi,
wiro ne pari fi kaha.”ⁱ

**Paulusi denatu Titusi itoru tono Korintusi we itofata
jematifo efanduhi ene doi etohona fo nanai**

¹⁶Ametohong mahikai paria we Allai, weo niari Titusi enerorong boyari ria amea, amani niariri yurai paria kariri amea we fiata meawa. ¹⁷Weo wiwo yoa we fianai aino ametutani wea fo tera kaha, wape mantauni kiutuai terai we da we mea mau, tuti de yurai paria we fiata mea ki. ¹⁸Tuti wiwo meiri kahai, mae ametemio tane doro manei riati, doro nani mani jematinei kiai etatori kontai weo fianai aino niari fo, amani wiuwu Kaiwo Mahikai na Allai kariri Kristusi fo. ¹⁹Tonanai tera kaha mae, inontarai nini mani, jematinesa etiriri we kiontai amea na amene rang rorong ne na rahida ameha fi mefanduhiai we tane doroifosa fo nanai. Fi mai metohona fo nanai, ameha ametohonai ambori Sempaisi mantauni wonongfo dadai sambewarai nayai, tuti ambori deinawiai we taenemirorong dohong we tafatasa tonana.

²⁰Amenemitituitane we ametemi tane doro nani dontai ria Titusi ne mani, weo ametanansiau weai paria ambori wiwo inontarai manei dinggai amea we amenari sarafieai na fi fubao fanduhiai tonina nei kaha.

ⁱ 8:15 Keluaran 16:18

²¹Amerurai we amenari fio mai pari fo terai, tuti nanai wiro mai na Allai urengreafu tera kaha, mae na inontaraine earomireafu kontai.

²²Amea kontai ametanatu tane doroi siai manei kontai ria Titusi suru. Inontarai nini ametitua wei we beiru teai ampa tuti amewatioia mani, inontarai ureng maya paria dine. Tuti ninaifa mani yurai paria we fiata mea we yoaso mea fo fuba paria, we fi metohonai tonana fo. ²³Mae we Titusi mani, nehu maniwowirio yufi ria yau dine we aufata mea. Tuti tane doroi manduo urontai riati ne suru mani, inontaraio jematinei kiai etemi suru di suru tuti uminohi toa fo wedaya Kristusi wonongfo sambewarai dedai aha. ²⁴Ampafe amenemitawanai we meteinawi menemiwawuwa we sitoru, ambori jematinei kiai ewaitawanai we menemiwawu sitoru tuti ewatioai we fianai aino ametaparandina kariri mea fo wetarai.

**Paulusi dutang we jemati na Korintusi fosa emainenang
fi etohonai we efata jemati na Yerusalemifo**

9 ¹Kariri fianai aino metohonai we mefata inontarai emararebanai na Yeruselemi fo, wiro yeyo imadu kaririai we mea ahang kaha. ²Weo iwaitawanai we memirising we mefata tane doroifosa, tuti yeparanding mea kaririai we inontarai na nu Makedonia nei ampa. Yeikaririai wesa, we na defuina bo da wa foi paria ninai, doroio na nu Akhaya wai mea memainenang kawuru ampa we mefanduhi doi we mefata tonanai ampa. Tuti mene memirising we menari finana fo wedaya bitoya na sa efaraise we enari tonanai kontai ampa. ³Wape yemi doroine sitoru mau ninai ambori fianai aino ametaparandina kariri mea fo dohonao manta kaiwo ariri arora tera fanai, wape todoni kontaio memainenang finanai kawurua watai. Weo imadurai wesa kawuru ampa we memainenang we mefata tonanai ampa. ⁴Imameataifa we masino rahida bo yontai mau wai inontarai Makedonia manea etontai ria yau, tuti ewatioai we wiro memainenang finana kaharai, nana mani amemamaya paria. Tuti mea kontai nana mani memamaya sewa aha. Weo imadurai kawurua we mea mani ameroaso mea ampa. ⁵Nanai wedaya nuhuruainsoai mai we yemi doroi nini sitoru we mea fafong mau, we itomainenang fio metarerai we metohona wa. Inari tonanafo we ambori rahida bo ira mau wai mani, fi metohonai nanai mainenang kawurua. Ambori na tonanane deinawiaia kasau we fianai aino metohonai tonana fo, metohonai na mewarami takahetuai funomai, wiro manei denggoa mea wea kaha.

Tatohonai na tawarami rirora ne mani, Allai mioang tata rai

⁶Mearomio fininai! Inontaraio kifa aibong bitoya kaha foi, ambori fi detingna fo kontai bitoya kaha. Wape mano kifa aibong bitoya foi, ambori fi detingna fo kontai bitoya ki. ⁷Mansiari-mansiari wau bohong fifo kariri

fianai aino kutuai na enemurorongwai, wiro morira ete numuruainso toyari manei denggoa wau we bohona fanai. Weo Allai enewawu mano dohong fi na enerorong mirising foi. ⁸Tuti Allai ne mambiriu we dohong ne bengfo fuba funomai we mea, ambori fifiani kontaio mene pari na wea kaha, tuti awa mesobuafo fuba we metohong ne bengfo fuba pari aha.

⁹Kariri kaiwo dotu na Kaiwo Mararebana fo kariri Allai deyo,

“I deto funong fi we inontarai ene pari fi fosa,
ne enerorong denteng fo nayai wefitawafa.”^j

¹⁰Allai andino meinenang aibong we mangkafa aibong foi tuti fiang we tata, I kontai ambori meinenang aibong bitoya pari aha we mea tuti mioang mene aibong mehafarai na menemirorong mesi foi nanai ambori wetaraifo fuba sewa aha ki. ¹¹Na tonanane na fifiani kontaio Allai mioang mea nayai fuba paria, ambori mewemambiriu we metohong fi na mewarami takahetuai funoma wa. Tuti fi metohonai tonanai ma ametatora fo wedaya inontarai efau etohong mahikai we Allai ki. ¹²Weo fi bengno menari ninai, wiro we dohong Allai ne inontarai emararebana fosa esobu fi demoyara tera kaha, wape kontai we ambori wedaya kaiwasa bitoya etohong mahikai fuba paria we Allai fo. ¹³Tuti na fibengno meteinaiwai nanai, inontarai efau ambori etaparanding Allai, weo ewati mene metohong kariri Kaiwo Mahikai kariri Kristusi, mano merariati foi. Kontai efiai Allai we mewarami takahetuaio metato fi we ea tuti we mandoni konta fo. ¹⁴Ampafe ea kontai ambori etutang tuti mea na enemirorongno enemiwawu mea foi, we Allai dohong ne bengfo arora we mea fuba paria fefe. ¹⁵Todoni kontaio tatohong mahikai we Allai we ne bengno tatatoafonsoa kahaio dohonai we tata fo!

**Paulusi medu na tapapa kariri todoni ne
mambiriufei we werasuli we Kristusi fo**

10 ¹Ninaifa mani yau Paulusi, yeyo yutang mea we fieaifa. Inontarai manea etei we yau eteyo, iwemambiriu paria tuti nehu kaiwofo tapapa na inayai waroi weru mea fo, wape ikefang meara mani iwewiwing tuti nehu kaiwofo fanahang arorawa. Wape na Kristusi mano enerorong denteng tuti ne kaiwo manang foi wonongfo, ²yutang mea paria we dohonao meteiaaya yau we iwerasuli ne tonana wedaya nehu kaiwofo tapapa we mea na rahida yontai we mea mau fo fe. Weo todoni kontaio imadu na tapapa we mano eteyo amea mani ameminohifo kariri fi nunei fosa rai. ³Tarai we amea ameminohi na nunei ne, wape wiro amerurai na mamuna rorong nini kariri fi nunei kaha. ⁴Weo amene fimamuna ameha na fi amerurai tutirai ninai, wiro fimamuna nunei fine kaha, mae Allai ne mambiriufu aino wefimamuna we ameane. Na

fimamuna nanai ameharai kobu aitetafosa ene katai enariria mitubaru we etadiwa tuti emamuna nai foi. ⁵Fianai aino inontarai enemirorong dedai fosa emadurai funomai we etapa Allai ne kaiwo wetarai fo, finanai ameharai kobuai, amenaria wefieai ahang kaha. Tuti ene katai etaparandini we mitubaru wesa, ebaunia dedai we ambori ewedaya inontaraifosa etaroanso Allai kaha foi, ametotawi ao misuhi. Inontarai enemitituitafo kiai ameru aitamuosa tuti amenarisa etohong kariri Kristusi ne dawiafo terai. ⁶Tuti masino metohong kaririai na maia mani, amemainenang we ametohong aiboifo we mano etohong kariri amene kaiwofo kaha fosa ki.

⁷Todoni kontaio mewaitawang kariri fianai aino mewatioai na meuremifea nanai! Masino manei yoasoai we i mani Kristusi ne inontarai dine, nana mani todoni kontai enetituitai we amea kontaio Kristusi ne inontarai di amea kariri i. ⁸Weo masino iboiwawa arohune karerai kontai mae, wiwo imamaya weai kaha. Weo fio iboiwawa arohune weai ne mani, todoni Sempaisi dohong ne mambiriwo we amea we amebaung mene meroasoawa, tuti wiwo we amenari mea meworu kaha. ⁹Dohonao menemititui we na itoi nehu kaiwo anatu yenatuai we mea wa nini irurai we inari mea mematai fe. ¹⁰Weo inontarai manei medu deyo, “Paulusi ne kaiwo anatu ne maraba tuti tapapa, wape dontai ma niyai rahang tata mani, inontaraifo mantauni finahang tuti ne kaiwofo wefiea kaha!” ¹¹Wape todoni kontai mano medu tonana foi, deitawanai we masino ametoari na meuremireawa mani, fianai aino ameso tapapa na amene kaiwo anatu fe ninai ne, ametohong kaririai kontai na tapapa na rahida amenai ria mea wa ki.

¹²Tarai we wiwo amebiriu we ameha amene tarainei ete ametitua amea we amemasi kariri inontaraio etaparanding berasa fosa kaha. Weo etitua berasa we efiai mantaunsa tuti ewati karirisa tonanai mani, ewebonggoi paria. ¹³Wape amea mani wiwo tonana kaha. Ameboi amearomi mani ametitua kariri fi ametaparanding amea wea fo, ambori ametaparanding amea terai we katai Allai dohonai we amerufi naya fo, amani na ameha ne Kaiwo Mahikai fo. Tuti katai nani mani, mea kontai. ¹⁴Tuti amene mambiriu we ametaunau mea toninai, weo ameha Kaiwofo we mea mau nanai, wiwo waroi karerai ete na boriai weru amene katai amerufi nai fo kaha, weo tarai amesobu mea tuti amewuwu Kaiwo Mahikai kariri Kristusi nanai we mea ampa. ¹⁵Kontai wiwo ameboi amearomi we fi inontarai siai enari na katai wiwo amerufi naya fo kaha. Mae amenemitawanai we na mene meroaso Kristusi fo mutu aha mani, amene fi ameru na mea bitoya sewa kontai aha ki. ¹⁶Pariao na tonanane amesobu rang kontai we amewuwu Kaiwo Mahikai fo na nu siaio waroi na wanai weru mea. Weo amemaya we ameboi amearomine we amerufi na inontarai siai ene katai erufi nai fea kaha, mae na katai mantaung amea amerufi naya tera fo.

¹⁷Wape toyari na Kaiwo Mararebana fo weai dotu deyo,
 “Mandoni dino bioi arong we fiea mani,
 wenani bioi arong we Sempaishi terai.”^k
¹⁸Weo wiwo na tafiai bera mantaung tata tera fo deinawiai we Sempaishi
 yoa we tata ne kaha, mae na Sempaishi mantauni fiai tata fo.

**Paulusi medu na tapapa kariri rasuli tarai
 kaha fosa na jemati Korintusi foi**

11 ¹Inari yau toyari iwebonggoi, amani yeyo imadu ifiai bera yau,
 ampafe yutang mea we metawang mea we nehu inari tonana
 fo. Mae iwaitawanai we metawang mea tonanai we yau ampa. ²Yohong
 we mea paria, kariri Allai mantauni dohong we meafo tuti ikasou mano
 erurai we eha mea weru yau fo. Mea mani yauno yere mea ampa we
 merau mang manei, amani Kristusi, we ambori yohong mea toyario
 kadawing sowaworua mirarebanai wei. ³Wape imameatai paria we
 dohonao manea ewawori mea eha mea weru mene meroaso Kristusi na
 mai tuti na menemirorong mesi foi fe, ne tarai toyari Hawaii fafongfa
 we tawaifo sofari we sawai na ne kaiwo sewai karira fo nana fe. ⁴Weo
 iwati mea mani mefaraise we metawang we mano era mau we etaunau
 kariri Yesusi manei siai, wiwo Yesusi mano amewuwui we mea foi kaha.
 Tuti memainenang kontai we mesobu nuaninu siai weru mano raminde
 mesobui foi, amani Allai Nuaninufoi. Kontai mefaraise we mesobu kaiwo
 mahikai siai fo weru Kaiwo Mahikaio mesobuai ria ameara fo. ⁵Wape
 we yau mani, nuhuruainso wiwo iwerasuline itawawa weru inontarai
 mesahusa we mene rasulio ewemambiriu sewa nanisa kaha. ⁶Tarahio na
 imadufo mani isawai turura kaha, wape na waitawang fi wetarai fo mani
 isawai paria. Finanai na fifiani kontaio ametainawiaia kasau we mea
 ampa na kaiwo amemadura ne tuti na ameminohi toa ne.

⁷Na rabuang bo iuwu Kaiwo Mahikai kariri Kristusi we mea fo,
 wiwo yutang mea we mebai yau kaha. Na tonanane inari nehu taraineia
 tewawa, ambori inari mea metadai. Ampafe inari tonanaifa mani inari
 sarawaifa ne? ⁸Rabuang bo irufi we mea nanai, jemati siaifo ansaino
 ebai yaune. Ampafe ne tarai toyari yewa jemati na katai siai, we isobu
 doi riasa we ifata mea. ⁹Tuti masino rabuang bonani nehu pari fi, wape
 wiwo yohong marabafeai we mane wau we fata yau kaha, weo fianai
 aino nehu pari wea fo isobuai mai ria doroio era na nu Makedonia mau
 fosa ampa. Yeitawang weduarai na fifiani kontai, ambori wiwo iwedaya
 mesobu marabafeai we yau fanai, tuti irurai we iwaitawang weduarai
 pampang tonanai. ¹⁰Ifafora na Kristusi ne Kaiwo wetarai nayai na yau
 ne, we mandoni kontai na nu Akhaya wai wiwo kiutu wedua yau na iboi

^k 10:17 Yeremia 9:24

arohune kariri todoni wiro iwedaya mea we mebai yau we iwuwu Kaiwo Mahikai fo we mea fo kaha. ¹¹We fianie imadu tonanai we yeyo, wiro iwedaya mea mesobu marabafeai we yau fanai wei ne? Weo enehuwawu mea kahai e? Bereri! Allai deitawanai we enehuwawu mea!

¹²Fianai aino inari ninai, amani irufi we Kristusi na yutang we doi we fiembaitai we yau kaha ne, inari pampang ki, ambori rasuli siaio wetarai kaha wasa esobu rang we etaparandinsa kariri amea fanai, ambori wiro ewemambiriu we eteyo emasi kariri amea na erufifo tutu esobu doi nayai kaha. ¹³Inontarai tonana nesa mani rasuli tarai disa kaha. Ea mani inontaraio erufi na mai kahai, amani etofa wawera kaiwasafosa enarisa toyari Kristusi ne rasuli saine. ¹⁴Inontarai tonana nesa, wiro tapapuhung wesu kaha, weo Saminseni mantauni kontaio tetofa niari ne taraifo we wewaio sambewara dine! ¹⁵Ampafe Saminseni ne mangfatafosa eweanggaru we enarisa we etohong kariri Allai ne dawiafo na enemirong mesi fo mani, finanai tapapuhung wea fanai weo fi waworu fine kaha. Inontarai tonana nesa ambori esobu ene fiembaitafo kariri fi karira fianai aino enari nanai ki.

Paulusi bioi arong kariri todoni werasulifo wedayari sodai dadirafo

¹⁶Yeyo imadu riwanai aha, dohona mane enemutituitai we iwebonggoi fe. Wape masino mea kontai menemititui tonanai we yau mani, meroa we yau metawang mea we yau kontai we iboi arohu kuteai toyari inontarai siai wasa. ¹⁷Fio yeyo imadurai aha nina mani, yeyo ifiai bera yau tuti iboi arohu wea ne. Wape imadu tonanafo wiro imadu kariri Sempaisi medufo kaha. Mae imadu terai kariri inontarai webonggoi. ¹⁸Kaiwasa bitoya efiai berasa kariri fi nunei, etaparandinsa we fi enari na mantaunsa ene mambiriufu, ampafe yau kontai yeyo yeparanding yau kuteai kontai. ¹⁹Oh, menari mea toyari inontarai mesawai paria di mea fenana, donio mefaraise we metawang mea we inontaraio ewebonggoi fosa ninai. ²⁰Weo mesawaie, donio metawang mea kontai we inontarai eharirao enari mea toyari womingfosa, we mano eru mea we eha mene ra wasa, we mano etaparandinsa we inontarai etadai sewa mea disa fosa, tuti we mano ehandio mea fosa. ²¹Tofino! Amea mani wiro amenari ne karirafeai tonana we mea kaha! Tarahai amene mambiriune demoyara kahai we amenari mea tonanai e? Oh, imamaya paria weo wiro amenari mea tonana kaha!

Wape toyari inontarai siai wasa eboi earomi we fiea mani, yau kontai inari yau we iwemambiriu we iboi arohu weai kontai. O tarai, imadu toyari inontarai webonggoi paria manei finanai. ²²Eweinontarai Iberani disa e? Ha! Yau kontai Iberani di yau! Inontarai Israeli disa e? Yau kontai Israeli di yau! Abrahami ne riria disa e? Yau kontai ne riria di yau! ²³Kristusi ne mangfata disa e? Wape yau mani Kristusi ne mangfata

isewasa di yau! (Eh! Tarai, imadu toninane toyari inontarai wefiauwow.) Weo yau mani, irufi we Kristusi mamboni sewa, inontarai esoa yau to aitamufi bitoya sewa, eruba yau maraba sewa na wai rubata fo, tuti bitoya paria mararehafoi dawawu yau. ²⁴We bering inontarai Yahudi fosa eraruba yau fo, amani we beyari mani eruba yau we boyari konta reti piaru. ²⁵Webetoru Romafosa eboi yau na aitatohi, webeyari kaiwasa eru kamieio yau. Webetoru yeisui na rawanangrau na wa defai, tuti webeyari yewohi na aiwowongfo na rawanangrau rahida bei diru bei. ²⁶Bitoya paria ira iuwu Kaiwo Mahikai fo, tuti na rang rorong nanai isodai fi karira bitoya kontai wedaya adareti imereha. Nana mani isodai foafoi, inontarai eharira fosa etawa yau, nehu inontarai amene nu boyari fosa, amani Yahudifosa, emamuna we yau, inontarai Yahudi kaha fosa kontai emamuna we yau. Isodai ne karira tonanafo na bendarifo, na aironongfo, tuti na rawanangrau. Tuti isodai finanai na doroi Kristeni tarai kaha fosa ewaramifo kontai. ²⁷Irufi mamboni tuti maraba paria, tuti rahida neungne adareti yena naria kaha, weaifa mani iwawisi tuti arohutataha, kaharifo ming yau, nehu ansung demoyara kahai adareti nehu tarainei niai arora tuti yenunanang. ²⁸Fi bitoya isodairi tonana foi tera kaha, mae rahida neungne nuhuruainso maraba kontai we todoni yewawu jematinei kiai fo. ²⁹Mandoni di finahang mae wiro ifanahang riati kahai ne? Masino manei sawai to sasari rorong foi mani, yau kontai enehurorongnei fituayai wei.

³⁰Ampafe masino awa iboi arohu we fieaifa mani, iboi arohu we fio deinawiai we iwemambiriu kaha fo. ³¹Allai, amani tane Seng Yesus tamanai, deitawanai we itofa kaha. Tafiai wonongfo wefitawafa. ³²Rahida bo inayai na bendari Damsiki fo, Mananuo Aretasi ne gubernuri mano wenunggamiei na nana foi, demi ne afai mamuna fosa we ewaitawang wedua bendarifo we etafu yau. ³³Wape nehu maniwowirifosa etu yau na nawang bei, na kamirei bei na wore kamiei foi to kofafo aweu. Ampafe ikaharai weru warangfoa.

Kaiwo kariri fio Allai deinawiai we Paulusi we detioa fo

12 ¹Tarai we taboi taaromine kia fieai we manei kahai kontai. Wape yeyo iboi arohune kutea aha we fi Sempaiai deinawiai we yau we iwatioa fo tuti yeitawana fo. ²Na kaiwo bonini imadu kariri mantaung yau wape toyari imadu kariri manei siai. Amani, yeroanso inontarai manei, inontarai nani mani inontarai daria Kristusi dine, defuina suraya boa dawa fo Allai yuaisi to katai dedai na Waidani. (Yeitawana kahai we ne taraifo dino Allai yuaisi tonanaifa ete nuaninufi e, Allai mantauni dino deitawanaifa ne.) ³⁻⁴Imadurai aha we, yeitawanai we inontarai nani Allai yuaisi to ne katai mirising pari foi. (Yuai ne taraifo ete nuaninufi, Allai mantauni dino deitawanaifa ne.) Na wanai inontarai nani tarao

fio mahikaio inontarainesa wirot ebiriu we emadura kaha fo tuti Allai wirot yoa weai we inontaraine emadura kahai kontai. ⁵Inontarai nani dino yeyo iboi arohu wei ne, wirot iboi arohu parai kariri mantaung yau kaha. Kariri yau mani, fio deinawi nehu ifanahangne aino yeyo iboi arohu wea ne. ⁶Mae masino yeyo iboi arohu we fieai konta mani, wirot iweinontarai borong beinseng kaha, weo fi wetarai fo aino imaduraifa ne. Wape itawang yau, ambori wirot manei deto yau we isewa fianai aino deti inaria fo ete tarao imaduraia fo fanai.

⁷Wape ambori wirot enehurorong dedai tuti borohu fiabai we fi mahikai sewa fubao anta Allai deinawiai we yau nanai fanai mani, Allai sua isodai fi maraba feai na nehu tarainei, ne tarai toyari ababo we disang yau, amani fi karirao Saminseni demi ma we niari kanggani yau nai. Ambori wirot enehurorong dedai fanai. ⁸Webetoru yutang Sempaasi we ambori yuai fi isodairi tonana foi weru yau. ⁹Wape yoa we yau deyo, “Wodai pirahawai tonanai ki, wape nehu beng yohonai arora we wau fo demoyarai we wau. Weo na nemu funahangwa, nehu mambiriufu kasau tuti mesi na wau wa.” Nanai wedaya todoni kontaio ifaraise sewa we iboi arohu we nehu ifanahangfo, ambori Kristusi deitawang wedua yau na ne mambiriufu. ¹⁰Ampafe ifaraise tuti nehu ifanahangne. Ifaraise we na iraria Kristusi fo wedaya inontarai eteibera yau, isobu dadira, etawi yau we emung yau, tuti isodai dadira karira pari fo. Weo ifanahang mani, nanai iwemambiriu tarai.

Paulusi enetituai we inontarai Korintusi fosa

¹¹Tarai we inari toyari inontarai webonggoi, wape meaino menari yau nehu tarai tonana ne. Wape ne antu mani, mefiai yau. Weo iwefiea kahai ki, wape titua weai na mano mesahusa we mene rasulio ewemambiriu sewa nanisa mani, wirot esewa yau kaha. ¹²Fio deinawio inontarai we werasuli tarai fi dine mani, amani fiainawiai, fitantuma tuti fieai na Allai ne mambiriufu, finani kiai inari rahang mea na itawang yau na rahida inayai ria mea fo. ¹³Weo na fi kiao inari we jemati siai fosa, finanai inari kontai we mea ampa. Wirot inari ta fieai we mea kaha. Fio tarahio inari tara mani, na iwuwu Kaiwo Mahikai ne, wirot yutang mea we mesodua ne maraba kuteai na mefata yau na doifea kaha. Tarahio menemitituai we tarai inari sarawai tonanai e? Oh, bereri paria!

¹⁴Ninaifa mani imainenang we yontai aha mau ituambawa mea webetoru fininai. Tuti iwedaya mea mesodai marabafea kaha rai. Weo fi yawi wea fo mani, fi meminohi tutira wa kaha, mae inontarai tarai mea ambori menemiwawu yau. Weo wirot arikangne ansaino esera we emainenang doi we wawafosa kaha, mae wawafosa ansaino esera we doi we arikangfosa ne. ¹⁵Nanai wedaya iparaise we fifiani kontaio itawini kiai we mea, awa nehu tarainei kontai itawini we mea kontai. Masino enehuwawu mea tonana mani, we fianie menemiwawu yau mayeai nina?

¹⁶Meroa weai ampa we wiro inari marabafeai we mea kaha. Tonanai ki wape emadu eteyo inontarai borong beinseng di yau tuti ifarao mea we itofa mea ika mene doiwa. ¹⁷Tofino, inontarai mano raminde yemi sitoru itorontai mau wa sitoru, yemi sitoru we itoha mene doifeai we yau e? Bereri kontai! ¹⁸Tarai we raminde yemi Titusi dontai mau suambawa mea tuti yemi tane doroi manei dontai riati kontai. Rahida bonani Titusi kia fieai ria mea re? Mewaitanai we auru mani, aurufi wea fo masi na auenemirorong mesi nei tuti aurohong toa fo masi kontai.

¹⁹Tarahai pariao ninai menemitituai we itoi finini kiai we ambori amemadu tutu amea na meuremireawa, we todoni rasuli tarai di amea fo ne? Bereri, mae na Allai urengreafo amemadurai terai we inontarai ameweboyari ria Kristusi di amea. Tuti fio amenariri nei kiai mani we mea, amani doroi amenemiwawu mea wa mea, we ambori mene meroasoawa mutu aha. ²⁰Weo imameataifa we rahida bo yontai mau ituambawa mea wai mani, dohonao isobu mea we wiro mene tarai kariri fianai aino enehutawana fo kaha fe. Tuti mea kontai wiro mewati yau we nehu tarai kariri fio menemitawanai weai nanai konta kaha fe. Imamea we dohonao mesawa mea, menemirorong pirahai we mea, mehasisou mea, mehatate mea, meteibera inontarai, metairiri kaiwo mai kaha, menemirorong dedai tuti mamamuna funomai. ²¹Imameatai we dohonao rahida bo ira mau wai, Allai niari yaua itawawa na mearomireawa, tuti isai we inontarai bitoya na mea raminde nanai enari sasarifo, wiro etaraberasa tuti efotou enari ene sasarifo nanai kaha, amani ene werarikafo, ene maninawafo, tuti ene epaingfo. Weo isobu fikirira tonanai na nehu arikangno irufi wesa fosa mani, wedaya yau imamaya tuti fi iru fo.

Paulusi ne kaiwo arerai wefuia fo

13 ¹Yontai aha mau we ituambawa mea ninaifa mani, yontai webetoru we mea finanai. Mearomioaifa, na Kaiwofo dotu deyo, “Sasarifea mani, sasari nanai inontarai mandu ete mantoruo itowati tera fo itoroa tubarai reto, ambori kaiwo nani ayaranane fe.”¹ ²Raminde yontai weberu mau fo, isua mea we mano enari sasari fosa ampa. Ninaifara mani, na inayai waroi weru mea ninai kontaio, isua mea nariai aha. Rahida bo yontai mau wai mani, mano raminde etohong sasari fosa konta mano siai fosa wiro ekaharai weru aiboi yohonai wesa fo kaha. ³Metutang we mesobu fiainawiaio deinawiai we Kristusi tarai medu na yau. Mewati mea! Ira mau mani, ambori mewatioai kasaua we Kristusi wiro finahang niari fi na mea kaha, mae wemambiriu paria na mea.^m ⁴Tarai we rahida bo epahui na aitabafoi ne mani, finahang. Wape

¹ 13:1 Ulangan 19:15 ^m 13:3 Fi Rasulifosa Enari 13:6-11

na Allai ne mambiriufu darang aha. Amea kontai amefanahang toyari raminde nanai Kristusi finahangfo, wape Allai ne mambiriufu wedayao ameweboyari ria Kristusi ambori amewemambiriu we amerufi na mea.

⁵Metitua bera mantaung mea we na meminohi toa wa, we meroaso Kristusi tarai ete bireri e? Todoni kontaio mewartawanai we Kristus Yesusi niyai na mea, mae meroasoai tarai kaha mani, bereri.ⁿ ⁶Tuti enehutawanai we mewati amea mani, kasau we mea ampa weo inontarai ameroasoai tuti Kristusi ne rasuli tarai di amea. ⁷Ninaia mani amewenadi we Allai ambori wirowi metohong sarawa kaha. Amenari tonanafo, wirowi ambori deinawiai we amea mani rasuli tarai di amea fo kaha, mae ambori menari ne wetaraio Allai dawi wea fo, masino manea etitua amea we rasuli tarai di amea kahai ki. ⁸Weo wirowi amenari fieai we dapa ne wetaraifo kaha, mae fi amenari fo mani we fi wetarai fo terai. ⁹Masino amefanahang mae mewemambiriu mani, amefaraise, tuti amewenadi we Allai kontai ambori niari meara memasi. ¹⁰Nanai wedaya isoi kaiwo anatu ninai na rabuang bo inyai waroi weru mea foi nina. Ambori na tonanane, yontai mau mani, iru nehu mambiriuo Sempaisi dohonai we yau ne we inari mea na tapapa fanai. Weo mambiriu nanai Sempaisi dohonai we ibaung mea nayai, wirowi itota meara meworu naya kaha.

Paulusi dohong mahikai

¹¹Doroi meaine, wefuiaine mani, todoni kontaio memirising to, merurai we ambori memasi na Allai urengreafo, metaramio nehu aunaune, menemirorong boyari, tuti meminohi na mai. Tuti Allai mano enemiwawufo tuti ne maifo weneung nai foi weriria mea.

¹²Metohong mahikai wawera mea na mai weinontarai Kristeni.

¹³Allai ne inontarai emararebana nesa kiai na ninai etohong mahikai kontai we mea.

¹⁴Kadono Seng Yesus Kristusi dohong ne bengfo arora we mea, Allai enewawu mea, tuti Nuaninu Mirarebana foi weriria mea kiai.

ⁿ 13:5 Matiusi 7:15-20